



ՀԱՄԱՏԵՂ ՀԱՂՈՐԴԱԳՐՈՒԹՅՈՒՆ

1978 թվականի մայիսի 19—22-ը Ամենայն Հայոց կաթողիկոսի եղբայրական հրավերով Մայր Աթոռ Ս. Էջմիածնում էր գտնվում Եթովպիայի ուղղափառ եկեղեցու Պատրիարք, Նորին Սրբություն Աբբա Թեքլե Հայմանոբը իր շքախմբի անդամների հետ: Սա եթովպական եկեղեցու մի Պատրիարքի առաջին այցելությունն էր հայ եկեղեցու պատմական կենտրոն սուրբ Էջմիածին:

Նորին Սրբության շքախմբին մաս էին կազմում եթովպական եկեղեցու սուրբ Սինդի բարտուղար և Կաֆայի արքեպիսկոպոս տ. Իոսիֆը, եթովպական եկեղեցու արտաքին հարաբերությունների բաժնի նախագահ և Գոջամի առաջնորդ տ. Մակարիոս արքեպիսկոպոսը, նույն բաժնի կառավարիչ Հավտե Սեյլասի տ. Թաուպա վարդապետը, Խաղաղության պաշտպանության եկեղեցիների կոնֆերանսի անդամ և Շատուայի նախագահ եկեղեցիների զխավոր վարիչ տ. Սողոմոն ալազ քահանա, ինչպես նաև ռուսաց եկեղեցու կողմից պատվիրակության ուղեկցող, Ղրիմի և Սիմֆերոպոլի առաջնորդ տ. Լեոնտի արքեպիսկոպոսը:

Մայիսի 21-ին, կիրակի օրը, ս. Էջմիածնի Մայր տաճարում մատուցվեց հանդիսավոր սուրբ պատարագ, որի ընթացքում Ամենայն Հայոց կաթողիկոսը և եթովպական եկեղեցու Սրբազան Պատրիարքը հանդես եկան եղբայրական փոխադարձ սիրո բարեմաղթություններով:

Նույն օրը Վեհաբանի սեղանատանը տրվեց պաշտոնական ճաշկերույթ՝ ի պատիվ Մայր Աթոռի բարձրաստիճան հյուրերի: Ընդունելության ժամանակ փոխանակվեցին բաժակաճառեր:

Մայիսի 22-ին, երկուշաբթի օրը, ժամը 10-ին, եթովպական եկեղեցու Սրբազան Պատրիարքի այցելության ամենահուզիչ պահը եղավ ծաղկեպսակի զետեղման արարողությունը և միատեղ աղոթքը 1915 թվականի հայ ցեղասպանության մեկուկես միլիոն զոհերի հիշատակին նվիրված Ծիծեռնակաբերդի հուշարձանի առաջ:

Նույն օրը, ժամը 11-ին, Հայոց Հայրապետին և եթովպական եկեղեցու Սրբազան Պատրիարքին ընդունեց Հայկ. ՍՍՀ Գերագույն սովետի նախագահության նախագահի տեղակալ Հովհաննես Բաղդասարյանը:

Հայոց և եթովպական եկեղեցիների հոգևոր Պետերի ու Հայաստանի

կառավարության ներկայացուցչի միջև տեղի ունեցավ ջերմ գրույց, որին ներկա եղավ նաև ՀՍՍՀ Միմիստրների խորհրդին առընթեր հայ եկեղեցու գործերի խորհրդի նախագահի տեղակալ Անդրանիկ Հասրաթյանը:

Հաջորդ օրերին Մայր Աթոռի մեծարգո հյուրերը այցելեցին Վաղարշապատի պատմական վանքեր՝ ս. Հովհաննիս, ս. Գայանե տաճարներ, ինչպես նաև ս. Գեղարդ վանք, Երևանի ս. Սարգիս առաջնորդանիստ եկեղեցի և Երևանի ս. Մեսրոպ Մաշտոցի անվան Մատենադարան:

Մայիսի 22-ին Վեհարանում հայ և եթովպական եկեղեցիների ներկայացուցիչների միջև տեղի ունեցավ տեսակցություն Էկումենիկ ոգով, որի ընթացքում գոհունակությամբ արձանագրվեց երկու քույր եկեղեցիների՝ մույն հավատի, դավանանքի և ավանդությունների հիմքի վրա զարգացող սերտ կապերը, ինչպես նաև հայ և եթովպացի ժողովուրդների միջև եղբայրական դարավոր անկեղծ բարեկամությունը, որը շարունակվում է նաև մեր օրերում, բարեկամություն, որի զարգացման և ամրապնդման համար աղոթում և աշխատում են երկու եկեղեցիները:

Խորհրդակցությունում երկու կողմերը հաստատեցին, որ եկեղեցիների կոչումն է իրենց ակտիվ նպաստը բերել՝ հանգցնելու համար աշխարհում դեռևս գոյություն ունեցող պատերազմական օջախները, իրենց ջանքերը միավորել պահպանելու և ամրապնդելու կայուն խաղաղություն աշխարհում, նպաստել գաղութային ստրկության և ցեղային խտրականության վերացմանն ուղղված բոլոր միջոցառումներին՝ կենսագործելու համար ազգային և սոցիալական արդարությունը աշխարհում, եղբայրությունը և հավասարությունը ժողովուրդների միջև:

Խորհրդակցության ընթացքում ցանկություն հայտնվեց, որ երկու եկեղեցիների միջև հետզհետե զարգանան գործակցության կապերը՝ փոխալցելություններով և դասախոսների ու ուսանողների փոխանակումներով:

Երկու Հայրապետները իրենց իղձը հայտնեցին մոտ ապագայում հարաբերության մեջ մտնել արևելյան ուղղափառ դավանակից մյուս երեք եկեղեցիների՝ ղպտական, ասորական և մալաբար եկեղեցիների Պետերի հետ՝ կազմակերպելու համար մոր հանդիպում վերահիշյալ քույր եկեղեցիների Հայրապետների միջև:

Եթովպական եկեղեցու Պատրիարք, Նորին Սրբություն Աքբա Թեքլե Հայմանոթը պաշտոնապես հրավիրեց Նորին Սրբություն Ս. Տ. Վազգեն Ա կաթողիկոսին այցելելու Եթովպիա մոտ ապագայում:

Հրավերը սիրով ընդունեց Հայոց Հայրապետը:

Սույն հաղորդագրությունը խմբագրվեց և ստորագրվեց ս. Էջմիածնի Վեհարանում 1978 թվականի մայիսի 22-ին:

ԱԲԲԱ ԹԵՔԼԵ ՀԱՅՄԱՆՈԹ
ՊԱՏՐԻԱՐԿ ԵԹՈՎՊԱԿԱՆ
ՈՒՂՂԱԲԱՌ ԵԿԵՂԵՑՈՒ

ՎԱԶԳԵՆ Ա
ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ս. Էջմիածին, 22 մայիսի 1978 թ.

